

**ጳውሎሲ
ዊምቶሳስ
ፃፊዳ ናምዓንቶ ኪታ
ጊዶ ቆፋ**

ጳውሎሲ ዊምቶሳስ ፃፊዳ ሃ ናምዓንቶ ኪታይ ጳውሎሲ ኤራይስ ዳር ማዶ ጊዲ ባና ማዲዛ አሶ ላጌ ጊዲዳ ናቴሳ ና ዊምቶሳስ ዩዲዳ ዞሬ ቃላ አይኪዴስ። ጳውሎሲ ዊምቶሳ ኢዚ ዳር ዳንዳያን ሚናና ማላ ዞሪዴስ። ዊምቶሲ ጳውሎሳፕ ኤኪዳ ሚኖ ዞሬ ቃላይ ኢሲ ዩሱስ ኪርስቶሳ ጊሽ አማኔቲዲ ማርካታና ማላ ሚሺራች ቃላኔ ካሴ ጋልዓ ጫቆ ጋርሳን ዲዛ ቲሚርቴዛካ ሚንሲ አይካና ማላኔ ኢዛስ አይኮ ዋዩይ ዳሪኮካ ታማርሶኔኔ ሚሺራች ቃላ ሳባኮ አንንታ ሚናና ማላሳ።

ዊምቶሳስ ኢሜቲዳ ሚኖ ዮዖይ ጮ ሜላ ኤያቴሳን አሳይ ፓላሜቲዛ ዮዖፕ ኢዚ ሃካና ማላሳ። ሄሳ ማላ ዮዖይ ሲዩዛይታ ዋሬስ አቲን ኢዚ ኢሚዛ ሃራ ጎዓይ ዴና።

ሃይሳ ኡባን ዊምቶሲ ዮሺ ቆፓናስ ቤሲዛይ ጳውሎሲ አማኖን ዋኒ ዴዒዳኮኔ፥ ኢዚ አይ ማላ ጌንጨዳኮኔ ኢዛ ሲቆዛ፥ ኢዛ ሚኖቴሳኔ ኢዛ ቦላ ጋኪዳ ዋዩዛ ሌሚሶ ኢዚ ካላና ማላ። ጳውሎሲ ሃይሳ ሃ ኪታ ፃፊዳይ ባ ላይሳ ወርሴሳን ሃይቆ ፒርዳይ ኢዛ ቦላ ፒርዴቲ ኡቲን ኢዚ ሃይቆ ናጊዛ ዎዴ። (2ዊም 4:6-8)

ሃ ማፃፋይ አይኪዳ ኩሜሳ ቆፋ

ጌሎሶ 1:1-2

ዊምቶሳስ ኢሜቲዳ ዞሬ 1:3-2:13

አሳይ ካዲዛ ዎዴ ሚኒ ኤቆ 2:14-4:5

ሄ ዎዴ ዲዛ ሃኖታኔ ሄይታ ጊሽ ኢሜቲዳ ዞሬታ 4:6-18

ኩሻ ቆፋ 4:19-22

1 ዩሱስ ኪርስቶሳራ ኢሲፌቴሳን ዲዛ ዴዖ ሂዶታ ቃላ ጊሽ ዮታና ማላ ዶሳ ሸኔን ዩሱስ ኪርስቶሳ ሃዋሬ ጊዲዳ ጳውሎሳፕ፥
2 ዶሴቲዳ ታ ና ዊምቶሳስ ኪያቴሲ፥ ማሮቴሲኔ ሳርቴሲ ዶሳ አዋፕ ጎዳ ዩሱስ ኪርስቶሳፕ ኔስ ጊዶ። *

ዊምቶሳስ ኢሜቲዳ ዞሬ

3 ፓጩይ ባይንዳ ጋላሲኔ ቃማ ኔ ጊሽ ዎሳን ቆፊሳሽ ካሴ አዋቲ አሲዳ ማላ ጌሻ ዎዝናራ ታ ጎይኒዛ ዶሳ ታ ጋላታይስ።

* 1:2 ሃዋ 16:1

4 ካሴ ኔ አፉንሳ ቆጋ ኤካዳ ታ ኔና ቤያዳ ኡፋዬታና ላሞታይስ።
 5 ቆዴፔ ቆሞን ጊዶንታ ኔ አማኖዛ ታ ቆጋይስ። ሄ አማኖይካ ኮይሮ ኔ አዩይ አይን ሎይዲኒኔ ቃሴካ ኔ አዩይን ኤዎንቄን ዴስ። ሃዲ ቃስ ኔ ቦላ ዲዛይሳካ ታ ኤራዲስ። * 6 ሄሳ ጊሽ ታኒ ታ ኩሼ ኔ ቦላ ዎሲን ኔ ኤኪዳይሳ ኔ ቦላ ዲዛ ዎሳ ኢሞታ ኔ ዴንሴሳና ማላ ታ ኔና ቆፊሳይስ። 7 ዎሲ ኑስ ኑኒ ኑ ሁዔ ሃራናስ ዎሳ ዎልቃ ኤራናሲኔ ሲቄታና አያና ኢሚዴስ አቲን ባቦ አያና ኢሚቤና።

8 ሄሳ ጊሽ ጎዳ ጊሽ ማርካታናስ ዎይኮ ጎዳ ጊሽ ቃሹቲዳ ታናን ዩላቶፓ። ጊዶ አቲን ዎሳ ዎልቃራ ሚሺራሾ ቃላ ጊሽ ታናራ ሜቶ ኤካ። 9 ኑ አይኮካ አሲዳ ጊሽ ጊዶንታ ዲሺን ባ ቆፋ ማላኔ ባ ኪያቴሳ ማላ ኑና አሺዳይኔ ኑና ኤራይስ ዱማሲዲ ኢዚ ዌይጊዴስ። ሄ ኢዛ ኪያቴሳይ ሜርና ዎዴፔ ካሴ ዩሱስ ኪርስቶሳ ባጋራ ኑስ ኢሜቲዴስ። 10 ሃዲ ቃስ ኢዚ ሃይቆ ዉርሲ ዳይሲዲ ሚሺራሾ ቃላ ባጋራ ኑና ፖዎን ኪሲዳ ኑ ዳሴ ዩሱስ ኪርስቶሳ ዩሳን ቆንጨዴስ።

11 ታካ ሃይሳ ሃ ሚሺራሾ ቃላ ዮቲዛዴ፣ ኪቴቲዳዴኔ አስታማራ ጊዳዳ ሹሜታዲስ። * 12 ታኒ ሜቶ ቤዩዛይካ ሄሳ ጊሻሳ። ጊዲኮካ ታ አና አማኒዛኮኔ ታኒ ታ አማኒዛዴ ሻካ ኤሪዛ ጊሽ ኢዛን ዩላቲኬ። ታ ኢዛስ ኢሚዳ ሃዳራ ሄ ጋላሲያ ጋካናስ ኢዚ ናጋናስ ዳንዳዩዛይሳ ታ ሻካ ኤራዲስ።

13 ኔ ታፔ ሲዩዳ ቲሚርቴዛ ዩሱስ ኪርስቶሳራ ኢሲፌቴሳን ዲዛ አማኖኒኔ ሲቆን ሴሚሶ ሂስታዳ አይካ። 14 ኔስ ኢሜቲዳ ሎዎ ሃዳራ ኑናን ዲዛ ዊሎ አያናን ናጋ። 15 ኢሲያ አዉራጃ ጊዶን ዲዛይቲ ዉሪካ ታና አጊዳይሳ ኔ ኤራሳ። ፊልጎሲኔ ሄርሞኔኔሲ ታና አጊዳ አሳ ጊዶን ዴቴስ። 16 ሄኔሲፎሬ ሶ አሳ ጎዳይ ማሮ፤ አይሲ ጊኮ ኢዚ ታና ዳሮ ዎዴ ሚንሴሲዴሲኔ፤ ታ ሳንሳላታን ቃሹታ ዲሺን ታና ቤይዲ ዩላቲቤና። 17 ሃራፔካ ኢዚ አሮሜ ዩዳ ዎዴ ታና ኮይ ኮይዲ ዴሚዴስ። 18 ዉርሴሳ ፐርዳ ጋላስ ጎዳይ ኢዛ ፐርዳፌ አሾ። ኢዚ ታና ኤፌሶኔን አይ ማላ ማዲዳኮኔ ኔ ሎዔሳ ኤራሳ።

2

1 ሄሳ ጊሽ፣ ታ ናዞ ኔኒ ጎዳ ዩሱስ ኪርስቶሳ ኪያቴሳን ሚና።
 2 ዳሮ ማርካታ ሲንሳን ኔ ታፔ ሲዩዳይሳ ሃራታ ታማርሳናስ ዳንዳዩዛይታሲኔ አማኔቲዳ አሳታስ ሃዳራ ኢማ።

3 ዩሱስ ኪርስቶሳስ አማኔቲዳ ሎዎ ዎታዴራ ማላ ታናራ ሜቶ ኤካ። 4 ዎታዳራቴሳን አሲዛዴይ ባ ሃላቃ ኡፋይሳናስ ዳፌቴስ

* 1:5 ሃዎ 16:1 * 1:11 1ዊም 2:7

አቲን ሃራ ባና ቃዔሲዛ አሶን ጌሊ ኤሬና። ⁵ ሄሳሶካ ጋዴ ዎጊዛዴይ ዎሳ ዎጋ ናጎንታ ዎጊኮ ዎኖ አክሊሌ ኤኬና። ⁶ ጎባ ጎሻንቻይ ባ ጎዩ ኬሲዳ ካሳ ሄራ ሚዛዴ ጊዳናስ ቤሴስ። ⁷ ታ ኔስ ጊዛይሳ ኔ ዎዝናን ዎሳ ሲዩኮ ጎዳይ ኔስ ዮዎ ኡባን አኬካ ኢማና።

⁸ ሃይቆፕ ዴንዲዳ ዳዉቴ ዜሬስ ጊዲዳ ዮሱስ ኪርስቶሳ ቆፓ፤ ታ ዮቲዛ ሚሺራቾ ቃላይካ ሄሳ። ⁹ ሄሳ ጌዶን ኢታ አሲዳ አሳ ማላ ቃሼታና ጋካናስ ዋዩ ቤያይስ። ጊዶ አቲን ያሳ ቃላይ ቃሼቴና። ¹⁰ ሄሳ ጊሽ ኪርስቶሳ ባጋራ ዲዛ አቶቴሲኔ ሜርና ቦንቾ ዴማና ዶሬቲዳይታ ጊሽ ጋዳ ዉርሳካ ዳንዳያዲስ።

¹¹ “ኑ ኢዛራ ኢሲፌ ሃይቂኮ ቃሴ

ኑ ኢዛራ ዴዎን ዳና።

¹² ዳንዳያን ሚኒኮ

ኑ ኢዛራ ካዎታና።

ኑ ኢዛ ካዲኮ ኢዚካ

ኑና ካዳና። *

¹³ ኑ ኢዛስ አማኔቶንታይታ ጊዲኮ

ኢዚ ሜርናስ አማኔቲዳ ማላ ዳና።

ኢዚ ባርካ ባና ካዳና ዳንዳዬና”

ጌቴቲዳ ቃላይ አማኔቲዳይሳ።

ሚኖ አሳንቻ

¹⁴ ሃይታ ሃ ዮዎታ ጊሽ አሳ ቆሬሶ አጎፋ። አሳይ ባ ጊዶን ኢሶይ ኢሳራ ቃላ ጌዶን ፓላሜቶንታ ማላ ያሳ ሱንሳን ዞራ። ሄሳ ማላ ዮዎይ ሲዩዛይታ ዋሬስ። ¹⁵ ቴሙ ያሳ ቃላ ዮቲዛዴ፣ ዮላቾንታ አሳንቻኔ አሲ ኔ ጊሽ ሎዎ ማርካቲዛዴ ጊዳዳ ኔናቴስ ዉርሳ ያሳ ሲንስ ሺሻናስ ሚና። ¹⁶ ጮ ሜላ ዱና ላላቤቴሳፌ ሃካ። ሄሳ ማላ ዮዎን ዋዔቲዳ አሳቲ ያሳፌ ሃኪ ሃኪ ቤቴስ። ¹⁷ ኢስታ ቲሚርቴይ ሳኪዲ ፓዎንታ ጌዴ ጉጂ ጉጂ ዳኬቲ ቢዛ ማዱንሳ ማላ። ሄሜኔዎሲኔ ፊልዎሳ ጌቴቲዛይቲ ሄሳ ማላ ቲሚርቴ ታማሪዛይታ ጊዶን ዴቴስ። ¹⁸ ሄይቲ ቴማቴሳፌ ሃኪዲ ጮ ሜላ ዋዩቴስ። ኢስቲካ ሃይቆፕ ዴንሲ ሃይሳፌ ካሴ ሃኒ አዲዴስ ጊዲ ኢሲ ኢሲ አሳ አማኖ ጉዩ ሺሪ ዩጌቴስ።

¹⁹ ጊዶ አቲን “ጎዳይ ኤራይስ ጊዲዛይታ ኤሬስ” ቃሴካ “ጎዳ ሱንስ ሄይጊዛይ ዉሪ ኢታፕ ሃኮ” ጊዛ ማታሜይ ኢዛ ቦላ ዲዛ ላሜቶንታ ያሳ ኮይሮ ቆፋይ ላሜቲቤና።

²⁰ ኢሲ ጊታ ኬሳን ዎርቃፌኔ ቢራፕ 9ላ ጊዶንታ ሚሳፌኔ ኡርቃፌ አሴቲዳይቲ ዲዛይሳሶ ሄይታንታፌካ ባጋይቲ ቦንቾ አሶስ፣ ባጋይቲ ቃስ ሂራይሶ አሶስ ኤኬቴቴስ። ²¹ ሄሳ ጊሽ

* 2:12 ማቶ 10:33፤ ሉቃ 12:9

አኒካ ሃይታ ታ ጊዳ ኢታ ዮዖታፔ ባና ጌሺኮ ሄሳዴይ ቦንቾ አሶስ ጊዲዛዴኔ አንጄቲዳዴ፤ ጎዳ ጎዲዛዴኔ ሎዖ አሶስ ጊጌቲዳዴ ጊዳና።

22 ፓንሳቴሳ ኢታ አሞቴሳፌ ባቃታ። ጌሻ ምዝናራ ጎዳ ዪይጊዛ አሳታራ ዲሎቴስ፣ አማኖ፣ ሲቆኔ ሳርቴስ ካላ።

23 ጎዳይኔ ሂዶታይ ባይንዳ ኤያታ ፓላማፔ ሃካ። አይሲ ጊኮ ሄሳንታ ማላይ አሽ ካሌሲዛይሳ ኔ ኤራሳ። 24 ጎዳ አሳንቻይ አሳራ አዩታናስ ቤሴና። ሄሳፌ አሳ ኡባ አቻን ኪያ፣ አስ ታማርሳናስ ዳንዳዩዛዴኔ ሚኖ አስ ጊዳናስ ቤሴስ። 25 ኢዚ ባናራ ኤቁቲዛ አሳታ አሽኬቴሳራ አይኪዛዴ ጊዳናስ ቤሴስ። እኔ ኤሪዛይ ኢስቲ ቴማ ኤራና ማላ ያሲ ኢስታስ ማሬታናስ ዎዴ ኢማና ዳንዳዩስ።

26 ሄሲካ ኢስቲ ዩሺ ቆፒ ሲሚዲ ኢዛ ሺኔ ኩንሳና ማላ ኢስታ ዲዲ ኤሬዳ ሃላዔ ናርግፌ ኢስቲ ኬሲ ኤካና።

3

ዉርሴሳ ዎዴን ያና ሜቶታ

1 ጊዶ አቲን ዎዴ ዉርሴሳን አስ ሜቲዛ ዎዴይ ያናይሳ ኔ ኤራ። 2 አሳይ ባና ዶሲዛዴ ጊዳና፣ ሚሼ ሲቁዛይታ፣ ባናን ጩቁቲዛይታ፣ አቶራንቻታ፣ ጫሻንቻታ፣ ባና ዩሊዳይታስ አዛዜቶንታይታ፣ ጋላቶንታይታኔ ጌሻቴሲ ባይንዳይታ፣ 3 ሲቆይ ባይንዳይታ፣ አቶ ጊ ማሮንታይታ፣ አሳ ሱንስ ሞሪዛይታ፣ ባርካ ባና ሃሮንታይታ፣ ሜንጺ ኢታ፣ ሎዖ ሚሽ ዶሶንታይታ፣ 4 ካዲዛይታ፣ ናጌቶንታይታ፣ ጮ ሜላ አቶራቴሳን ኩሚዳይታ፣ ያሳፌ አሲዲ ሎዖ ዴስ ዶሲዛይታ ጊዳና። 5 አማኒዛ አስ ሚሳታና ሺን አማኖስ ዲዛ ዎልቃ ካዳና። ሄይታ ማላታፔ ኔ ሃካ።

6 ሄይታንቲ ኢሲ ኢሲ ኬሴ ካልጻ ጌሊዲ ዳሮ ዴዖ ናጋራኒኔ ዱማ ዱማ ኢታ አሞቴሳ ጋርስ ጌሊዲ ሄኔ ሃ ቃዲዛ አማኖን ላፋ ማጫሳታ ቃዲ አይኬቴስ። 7 ሄይታ ማላ ማጫሳቲ ኡባ ዎዴ ታማራቴስ ሺን ቴማ ኤሪ ኤሬቴና። 8 ኢያኔሲኔ ኢያንባራሲ ሙሴ ቦላ ዴንዲዳ ማላ ሃይቲካ ኢስታ ቆፋይ ሞሬቲን ኤራይስ አማኖፔ ኩንዲዳ ጊሽ ቴማቴስ ኢዬቴስ። * 9 ጊዶ አቲን ኢስታ ቆፋይ ኩሜና። ጋሶይካ ኢያኔሳኔ ኢያንባራሳ ኤያቴስ አሳስ ቆንጨዳ ማላካ ሃይታ ሃኖይካ ኡባስ ቆንጫና።

ጳዉሎሲ ዲምቶሳስ ኢሚዳ ሃዳራ

10 ኔ ጊዲኮ ታ ቲሚርቴዛ፣ ታ ዱሳ፣ ታ ሞና ቆፋ፣ ታ አማኖዛ፣ ታ ዳንዳያ፣ ታ ሲቆዛኔ ታ ሚኖቴሳ ዉርሳ ኤራሳ። 11 ታ ጎዴቴሳኔ ታ ሞዩዛ አንዎኪያን፣ ኢቆኔዮኒኔ ሊስቲራንካ ታ

* 3:8 ኬሳ 7:11

ቦላ ጋኪዳይሳ ወርሳ ታ ዳንዳያን ኤኪዳይሳ ኔ ኤራሳ። ጊዲኮካ ጎዳይ ሄሳ ኡባፌ ታና አሺዴስ። * 12 ቱማፕ ዩሱስ ኪርስቶሳ ጌሻ ዎዝናፕ አማኒ ዳና ጊዛይቲ ወሪካ ጎዴቲዛይታ ጊዳና። 13 ኢታ ባሌሲዛ አሳቲ ኤራይስ ባሌቲዲ አሳ ባሌሲሼ ኢታቴሳ ቦላ ኢታቴሳ ጉጂ ጉጂ ባና።

14 ኔ ጊዲኮ ካሴ ኔ ታማራዳ ኤሪዳ አጌን ሚና። ሄሳ አናፕ ታማሪዳኮኔ ኔ ኤራሳ። 15 ኔ ጉሳ ናቴሳፌ ሃዲ ጋካናስ ዩሱስ ኪርስቶሳ አማኖን አቶቴሲ ቤቲዛ ቲሚርቱ ኢሚዛ ጌኤሻ ማፃፋታ ሎዔሳ ኤራዳሳ። 16 ጌሻ ማፃፋቲ ወሪካ ያሳ አያናይ ካሌሲን ፃፌቲዳይታ፤ ኢስቲካ አስ ታማርሳናስ። ሃንቃናስ፣ ሱሪሳናስ ቃሴካ ጊሎቴሳ አጌን ካሌሳናስ ጎዔቴስ። 17 ሄሲካ ያሳ አሲ ሎዎ አሶ ኡባስ ቤሲዛዴ ጊዳና ማላሳ።

4

1 ያሳ ሲንሳኔ ሄሳሶካ ፓፃ ዲዛይታ ቦላኔ ሃይቂዳይታ ቦላ ፐርዳናስ ዲዛ ዩሱስ ኪርስቶሳ ሲንሳን ኢዛ ቆንጩሳኔ ኢዛ ካዎቴሳ ቆፋራ ሃይሳ ኔስ ሃዳራ ጋይስ። 2 ቃላ ሳባካ፤ ኔስ ጊጊን ዎይኮ ጊንንታ አጊን ኔኔ ኔ ባጋራ ጊጋ ኡታ። ዳሮ ዳንዳያራ ታማርሶን አሳ ሱሪሳ፤ ሃንቃኔ ዞራ። 3 ጋሶይካ አሳይ ወሪ ሱሬ ጊዲዳ ቲሚርቱ ኤኮንታ ኢዳና ዎዴይ ያና። ሄሳፌ ቦላራ አሳይ ባ አዎራ ጋጊዛይሳ ኢስታ ሃይሴይ ሲያና ኮዩዛይሳ ፃላ ኢስታስ ዮታና ማላ ባና ታማርሳና ዳሮ አስታማሬታ ባ አቺ ሺሻና። 4 ቱማ ሲያናፕ ባ ሃይሳ ሃራሶ ዛሪዲ ሃይሲዔ ባጋ ሲማና። 5 ኔ ጊዲኮ ሃኒዛ ዮዎን ኡባን ሎዱ ጋ፤ ሜቶ ዳንዳያ፤ ሚሺራቾ ቃላ ዮቶ ኔስ አሶ ሂስታ፤ ኔ አሶዛካ ፖላ።

6 ታ ቃስ ያርሼታናስ ማታ ኡታዲስ፤ ሃይሳ ሃ አላሜዛፕ ሻኬታ ቡሳ ዎዴይ ታስ ጋኪዴስ። 7 ሎዎ ባዔ ታ ባዔታዲስ፤ ታ ዎፃና ዎሴ ወርሲሳዲስ። አማኖካ ናጋዲስ። 8 ሲንሳፌ ታስ አክሊሌይ ጊጊ ኡቲዴስ፤ ሄሲካ ጊሎቴሳ። ሄሳካ ቱሙ ፐርዲዛ ጎዳይ ሄ ጋላስ ታስ ኢማና። ሄሲካ ታስ ፃላ ጊዶንታ ኢዛ ዮሳ ላሞቲዛይታስ ኡባስካ ኢማና።

ጳውሎሲ አዛዚዳ ወርሴሳ አዛዞ

9 ታኮ ኤሌላ ያናስ ኔስ ዳንዳዩቲዳ ማላ አሳ። 10 ዴማሲ ሃይሳ አላሜዛ ሲቂዲ ታና ዩጊ አጊዲ ታሶሎንቄ ቢዴስ። ቃርቂሲ ጋላቲያ ቢዴስ። ቲቶሲ ጌዴ ዳልማዒያ ቢዴስ። * 11 ሉቃሲ ፃላ ታናራ ዴስ። ማርቆሲ ታና አሶን ማዲዛ ጊሽ ኢዛ ኔናራ ኤካ

* 3:11 ሃዎ 13:14-52፤ 14:1-20 * 4:10 ቆላ 4:14፤ ፕል 24፤ 2ቆሮ 8:23፤ ጋላ 2:3፤ ቲቶ 1:4

ያ። * 12 ተቋቆሳ ኤፌሶኔ ዮዳዲስ። * 13 ኔ ሃ ያሼ ታ ዒሮግዳን አኪርጳ አቻን ዎሲዳ ታ ማቃኔ ማፃፋታ ሃራፔካ ጋልባን ገፌቲዳ ማፃፋታ ታስ ኤካ ያ። *

14 ገርቁማላ ቆዒዛ ኢስኪንዲሮሲ ታ ቦላ ዳሮ ቆሆ ጋሲዴስ ሺን ጎዳይ ኢዛስ ኢዛ አሶ ማላ ኢማና። * 15 ኢዚ ኑ ዮቲዛ ቃላ ኬሂ ኢዒዴስ። ኔካ ኢዛፔ ናጌታ።

16 ታና ሞቲዛ ዮዎዛስ ኮይሮ ታና አሻና ማርካ ታ ሺሺን አኒካ ታና ማዳና ዩቤና። ጊዶ አቲን ወሪካ ታና ዩጊዲ ቢዳ። ሄሳካ ኢስታ ቦላ ያሲ ቆሆ አሲ ቆዶፖ። 17 ጊዶ አቲን ቃላ ኪታይ ታ ባጋራ ኩሜስ ዮቲታና ማላኔ ዴሬ አሳይ ወሪ ሲያና ማላ ጎዳይ ታ አቻን ኤቁዲ ታና ሚኒሲዴስ፤ ጋሞ ዱናፔካ ታና አሺዴስ። 18 ጎዳይ ኢታ ዮዎ ኡባፌ ታና አሻና። ጌዴ ባ ሳሎ ካዎቴሳስ ታና ሳሮራ ጋሳና። ኢዛስ ሜርናፔ ሜርና ጋካናስ ቦንቾይ ጊዶ። አሚን።

ወርሴሳ ሳሮካ

19 ጳርሲቁላስ፣ አቁላስ፣ ሄኔሲፎሬ ሶ አሳስካ ታ ሳሮካ ጋላ። * 20 ኤሪስዎሲ ቆሮንቶሴን አቲዴስ። ዒሮፎሞሲ ሳኬቲዳ ጊሽ ኢዛ ታ ሚሊዔን አጋዲስ። * 21 ባልጎይ ጋካናፔ ሲንሴታዳ ታኮ ሃ ጋካናስ ኔስ ዳንዳዮቲዳ ማላ አላ። ኤወጉሎሲ፣ ጳዴሲ፣ ቃሴካ ሲኖሲ፣ ቁላወዲያይኔ አማኒዛይቲ ወሪካ ኔና ሳሮ ሳሮ ጊዳ። 22 ጎዳይ ኔናራ ጊዶ። ጎዳ ኪያቴሲ ኢንቴናራ ጊዶ።

* 4:11 ቆላ 4:14፣ ፒላ 24፣ ሃዎ 12:12፣25፣ 13:13፣ 15:37-39፣ ቆላ 4:10፣ ፒላ 24 * 4:12 ሃዎ 20:4፣ ኤፌ 6:21-22፣ ቆላ 4:7-8 * 4:13 ሃዎ 20:6 * 4:14 1ዓም 1:20፣ ማዛ 62:12፣ ኦሮ 2:6 * 4:19 ሃዎ 18:2፣ 2ዓም 1:16-17 * 4:20 ሃዎ 19:22፣ ኦሮ 16:23፣ ሃዎ 20:4፣ 21:29

አራሳ ጫቆ ማገፋ ጋሞላ

New Testament in Gamo (ET:gmv:Gamo)

copyright © 2011 Wycliffe Bible Translators, Inc.

Language: Gamo

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Gamo

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 12 Mar 2019 from source files dated 12
Mar 2019
dffa0cbb-5f77-5875-bf95-f4176677af45